

NORÛ TAXRE GA POPERA GA

TIMÚTEUCAÇ NAXÛMATÛXÛ GA PAURU

TimúteuxÛ narúmoxe ga Pauru

1 ¹Pa Timúteux, chama i Pauru nixĩ i cuxçax chanaxumatuxũ i nhaã popera. Rũ choxũ nixĩ ga namuxũ ga Ngechuchu ja Cristu, jerũ jemaãcü nanaxwaxe ga Tupana. Rũ nüma choxũ namu na nüxũ chixuxũcax na nhuxãcü tüxũ nangẽxmaxũ i maxũ i taguma gúxũ, ega aixcuma Ngechuchu ja Cristuaxũ jaxõgũ. ²Cuxũ changechaũ, Pa Chaune, Pa Timúteux. Rũ chanaxwaxe ja Tanatũ ja Tupana rũ Ngechuchu ja Cristu ja tórũ Cori na cuxũ nangũẽẽgũxũ rũ nüxũ cungechaũtũmũũgũxũ rũ cuxũ nataãẽẽgũxũ.

**Tama name i taxãne na
Cristuchigaxũ ixuxũ**

³Guxũguma i chũtacũ rũ ngunecũ rũ cuxna chacuaxãchixũ i chorũ jumuxẽwa, rũ poraãcü cuxçax moxẽ Tupanana chaxã. Rũ nüxũ nixĩ i chapuracũxũ i mexũ i chauãemaã, jexgumarũũ ga nuxcũmaxũgũxũ ga chorũ oxigũ naxũgũxũrũũ. ⁴Chama rũ nüxna

chacuaxãchi ga na nhuxãcü poraãcü chauççax cungechaũxũ rũ chauççax cuxaxuxũ ga jexguma cuxna íchixũxgu. Rũ wenaxãrũ cuxũ chadauxchaũ na aixcuma chataãẽxũcax. ⁵Erũ nüxna chacuaxãchi na nhuxãcü meã aixcuma Tupanaãxũ cujaxõxũ. Rũ curũ noxẽ ga Roĩ rũ cue ga Euníchia rũ tũxira aixcuma meã Tupanaãxũ tajaxõgũ rũ nüxũ chacuax i cuma rũ ta na meãma nüxũ cujaxõxũ. ⁶Rũ ngẽmacax cuxna nüxũ chacuaxãchixẽẽ na cugũ cuporaxẽẽxũ na jexeraãcü cunaxũamaxũcax i ngẽma Tupanaãrũ puracũ ga naxçax cuxna naxããxũ ga cuax ga jexguma noxri cuxũ chingõgũãcũma cumaã chajumuxẽgu. ⁷Erũ ngẽma Naãẽ i Üünexũ i Tupana tũxna ãxũ rũ tama nanaxwaxe na imuũẽxũ, notũrũ tüxũ naporaexẽẽ na aixcuma duũxũgũxũ ingechaũgũxũcax rũ meã jigũmaã icuãxũcax. ⁸Rũ tama chanaxwaxe na cuxãnexũ na nüxũ cuixuxũ i nachiga ja tórũ Cori. Rũ ngẽxgumarũũ ta tama chanaxwaxe i chauççax cuxãne i ngẽma na chapocuxũ naxçax i Tupanaãrũ ore. Rũ name nixĩ i

jaxna namaã cuxĩnũ i ngẽma ngúxũ i cuxçax ínguxũ nagagu i ngẽma ore i mexũ i nũxũ cuixuxũ. Rũ Tupana tá cuxũ naporaxẽẽ. ⁹⁻¹⁰Rũ Tupana tũxũ namaxẽxẽẽ rũ tũxũ nidexechi na naxçaxicatama imaxẽxũçax. Notürũ tama ãacũ rũ mexũ na ixũxũgagu nixĩ ga jemaãcũ tamaã namecũmaxũ ga Tupana. Notürũ jemaãcũ tũxũ narũngũxẽẽ jerũ woetama jema nixĩ ga nanaxwaxexũ jerũ Ngechuchu ja Cristugagu tũxũ nangechaũ. Rũ nũma ja Tupana ga tautama naãne ãxgumama tũxũ ngechaũcũ, rũ jexguma ínguxgu ga tórũ maxẽxẽẽruũ ga Ngechuchu ja Cristu, rũ jexguma nixĩ ga Tupana tũxũ nũxũ dauxẽẽxũ na nhuxãcũ poraãcũ tũxũ nangechaũxũ. Rũ nũma ga Cristu nixĩ ga íjanaxoxẽẽãxũ na íjuxuchixũ jerũ nũma rũ juwa ínarũda rũ wena namaxũ. Rũ norũ orewa tũxũ nũxũ nacuaçxẽẽ na jixema rũ ta tũxũ nangẽxmaxũ i ngẽma maxũ i taguma gúxũ ega nũxũ jaxõxgu. ¹¹Rũ Tupana choxũ ningucuchixẽẽ na nũxũ chixuxũçax i ngẽma norũ ore i mexũ. Rũ choxũ namu na ngẽma oremaã chanangúxexẽẽxũçax i duũxũgũ i guxũwama. ¹²Rũ ngẽmacax nixĩ i poraãcũ ngúxũ chingexũ rũ chapocuxũ i nhuxmax. Notürũ tama naxçax chaxãne i ngẽma, erũ chama nũxũ chacuax na texeãxũ çajaxõxũ. Rũ nũxũ chacuax na naporaxũ i nũma na nũxna nadauxũçax i ngẽma puracũ i choxna naxãxũ rũ namaã inacuãxũçax i chauãẽ i guxũgutãma nhuxmatãta ngẽma ngunexũ i nagu wena núma naxũxũ. ¹³Rũ chanaxwaxẽe i meãma nagu cuixũ i ngẽma nguxẽẽtae i mexũ ga chauxũtawã naxçax cungúxũ. Rũ name

nixĩ i meã nũxũ çujaxõõma ja Ngechuchu ja Cristu rũ meã nũxũ cungechaũ i guxũma i duũxũgũ, erũ Cristuarũ duũxũ cuixĩ. ¹⁴Rũ name nixĩ i Tupanaãẽ i Üünexũ i tawã maxũxũãrũ ngũxẽẽmaã ícunapoxũ i ngẽma nguxẽẽtae i mexũ i Tupana cuxna ãxũ. ¹⁵Cuma marũ nũxũ cucuax rũ guxũma ga jema jaxõgũxũ ga Áchiaarũ naãnewã ne íxũ rũ marũ choxna naxĩgũ. Rũ jematanũwa najexma ga Figueru rũ Ermõquene. ¹⁶Onesíferu rũ muẽxpũxcũna choxũ nataãẽxẽẽ, rũ tama chauççax naxãne i ngẽma na chapocuxũ. Rũ ngẽmacax chanaxwaxẽe i tórũ Coriaxũ nangechaũtũmũgũ i guxũma i natanũxũgũ. ¹⁷Rũ jexguma noxritãma Romawã nanguxgu ga nũmax, rũ chauççax nadauecha rũ nhuxmata choxũ íjangau. ¹⁸Cuma meãma nũxũ cucuax ga nhuxãcũ tũxũ na nangũxẽẽxũ ga Onesíferu ga Epẽchiuarũ íãnewã. Rũ ngẽmacax chorũ jumuxẽwã naxçax íchaca na Tupanaãxũ nangechaũtũmũxũçax i ngẽxguma wena nhama i naãnewã naxũxgu ja tórũ Cori ja Ngechuchu.

Ngechuchu ja Cristuarũ puracũtanũxũ i mexũchiga

2 ¹Rũ nhuxma, Pa Chaune, Pa Timóteux, rũ cuã naporaxẽẽ namaã i ngẽma porã i Ngechuchu ja Cristu cuxna ãxũ! ²Jema ore ga chauxũtawã nũxũ cuxĩnũxũ ga jexguma muxũma ga duũxũgũpexewã nũxũ chixuxgu, rũ chanaxwaxẽe i nhuxma cuxi ngẽma oremaã cunangúxexẽẽ i togũ i jatũgũ i meã naãẽxũ cuaxgũxũ na nũxĩ togũxũ nangúxexẽẽxũçax namaã i ngẽma

ore. ³Rü tama name i naxçax cumuũ na Ngechuchu ja Cristuarü oregagu ngúxũ cuingexũ. Notürü cunaxwaxe i namaã cupora nhama wüxi i mexũ i norü churararüü. ⁴Rü wüxi i duũxũ i churarawa ngëxmaxũ, rü taxucürüwama to i puracü i tama churaraarü ixĩxũgu narüxinü. Notürü ngëma norü ãëxgacü nagu namuxũ i puracügu nixĩ i naxĩnũxũ na ngëmaãcü norü ãëxgacüxũ nataãëxëxũçax. ⁵Rü ngëxgumarüü ta wüxi i duũxũ i wüxi i cuxgütaexũwa nügü ingucuchixëxũ, rü taxuacüma nanajaxu i norü ãmare ega chixri nacuxgütaegu rü tama ngëma cuxgütaearü ãëxgacüga naxĩnügu. ⁶Rü texé ja naãnewa puracüxe rü name nixĩ i tüxira tanajaxu i tümanetüarü o. ⁷Rü guxũguma nagu rüxinü i nhaã ore i cumaã nüxũ chixuxũ! Rü nüma ja Cori ja Ngechuchu tá cumaã inananguxũxëë i guxũma na nüma nanaxwaxexũãcüma cunaxüxũçax i ngëma puracü. ⁸Rü nüxna nacuxãchi ja Ngechuchu ja Cristu ja Dawitanüxũ ga guma juwa írüdacü! Rü jimachiga nixĩ i ngëma ore i mexũ i duũxũgümaã nüxũ chixuxũ. ⁹Rü ngëma oregagu nixĩ i ngúxũ na chingexũ rü nhama wüxi i máëtaxürüü núma pocupataũwa curëtimaã chichotaxũ. Notürü Tupanaärü ore i mexũ, rü guxũwama nanguama rü taxucürüwama texé tajachota. ¹⁰Rü ngëmacax jaxna namaã chaxĩnü i ngëma ngúxũ i chingexũ naxçax i ngëma duũxũgü i Tupana idexechixũ. Erü chanaxwaxe i nümagü rü ta Ngechuchu ja Cristuaxũ najaxögü, rü ngëmaãcü na najauxgüãxũçax i maxũ i mexũ i taguma gúxũ. ¹¹Rü pemaã nüxũ chixuxchaũ i

wüxi i ore i aixcuma ixĩxũ. Rü ngëxguma Cristu juxürüü norü orecax ijuegu, rü naxrüü tá ta wena tamaxë na nüma íngëxmaxũwa íngëxmagüxũçax. ¹²Rü ngëxguma nhama i naãnewa jaxna namaã ixĩnüëgu ega ngúxũ íngëxgu, rü dauxũguxũ i naãnewa rü wüxigu namaã ãëxgacü tá tixĩgü. Rü ngëxguma tama Cristuxũ icuáxchaũgu i nhama i naãnewa, rü nüma rü tãũxütáma tüxũ nacuáxchaũ i dauxũguxũ i naãnewa. ¹³Notürü woo nhuxguacü i jixema rü tama aixcuma naxüxgu i ngëma Tupanamaã ixunetaxũ, notürü nüma ja Tupana rü guxũguma najanguxëë i ngëma tamaã inaxunetaxũ, erü taxuacüma nügütama nawomüxëë.

Wüxi i mexũ i puracütanüxũ i Tupana namaã taãëxũchiga

¹⁴Rü ngëma jaxögüxũ i cuxütawa ngëxmagüxũ, rü name nixĩ i Tupanaégagu nüxna nüxũ cucuxãchixëë na tama nuxcümáxũgüxũ i ore i taxuwama mexũçax nügümaã na japoragatanücüxũçax. Erü ngëma rü wüxi i chixexũ nixĩ, rü nanachixëãëxëë i ngëma duũxũgü i nüxũ ínüëxũ. ¹⁵Rü cugü naporaxëë na meã cunaxüxũçax i Tupanaärü puracü na nüma cumaã nataãëxũçax i ngëxguma napëxewa cunguxgux! Erü tama cunaxwaxe i çacüçax nüxũ cuxãne i ngëxguma nüma cuxna nacaxgu i curü puracüchiga. ¡Rü ngëmacax cunaxwaxe i aixcuma meã namaã cungüexëëtae i ngëma ore i mexũ i aixcuma ixĩxũ! ¹⁶Rü nüxũ rüxo i nhama i naãnecüãxãrü dexagümare i taxuwama mexũ! Erü ngëma duũxũgü i ngëma dexagümaregu íxũ, rü guxũguma

jexeraãcü chixexũgu naji. ¹⁷Rü ngẽma norü nguxẽẽtae i ngẽma duũxũgü, rü nhama wüxi i ðaaweane i tüxũ ðjmachixẽẽxũrüü nixĩ. Rü jema nixĩ ga nüxũ ngupetüxũ ga Imenéu rü Firetu. ¹⁸Jerü nidoragümare ga nüxũ na jaxugüexũ rü marü na nangupetüxũ i juetaarü dachiga. Rü jemaãcü nanawomüxẽẽgü ga nhuxre ga duũxũgü na tama noxrirüü jaxõgüãxũcax i Tupanaãrü ore. ¹⁹Notürü Tupanaãrü ore rü taguma inajarüxo rü taguma naxüchicüü. Rü ngẽma norü orewa rü nhanagürü:

“Törü Cori ja Tupana nüxũ nacuaç i texé tixĩ ja norü duũxũgü ixĩgüxe. Rü guxãma ja jixema nüxũ ixuxe na Ngechuchu ja Cristu rü tümaãrü Cori jiĩxũ, rü name nixĩ i nüxna tixĩgachi i guxũma i chixexũ”,

nhanagürü i ngẽma norü orewa. ²⁰Wüxi i duũxũ i dñeruãxũchixũ rü napatawa nangẽxma i poratu i uirunaxcax rü dñerumünaxcax. Rü nangẽxma ta i poratu i naĩnaxcax rü waixũmünaxcax. Rü ngẽma poratu i uirunaxcax rü dñerumünaxcax rü mexũ i norü õnacax nixĩ. Notürü ngẽma poratu i naĩnaxcax rü waixũmünaxcax rü guxchirechixũ nixĩ. ²¹Rü ngẽxguma wüxi i jaxõxũ naxwaxegu na aixcuma mexũ i Tupanaãrü puracütanüxũ na jiĩxũ, rü name nixĩ i nüxna nixũgachi i guxũma i chixexũ. Rü ngẽxguma tá nixĩ i Tupanapexewa aixcuma naxüünexũ na naxüãxũcax i nagüxũraũxũ i puracü i Tupana namaã nüxũ ixuxũ. ²²¡Nüxũ rüxo i guxũma i ngẽma chixexũ i ngextjüxcügü nagu rüxĩnüẽxũ! ¡Rü meã

Tupanapexewa namaã rü aixcuma nüxũ jaxõ! ¡Rü nüxũ nangechaũ i guxũma i duũxũgü, rü táũ i namaã cunuxũ! Rü ngẽmaãcü chanaxwaxe i cumaxũ wüxigu namaã i guxũma i ngẽma duũxũgü i ngearü pecaduãxãcüma Tupanamaã jumuxẽgüxũ. ²³Rü tama name i icurüxĩnü i ngẽma dexagü i taxuwama mexũ. Erü ngẽma dexagügagu rü düxwa nügüchi naxaie i duũxũgü. ²⁴Rü wüxi i Tupanaãrü puracütanüxũ rü tama name na namücuchi naxaixũ. Notürü name nixĩ i guxũma i duũxũgümaã namecüma. Rü nanaxwaxe i jaxna namaã naxĩnüãcüma meã duũxũgüxũ nangüexẽe i Tupanaãrü ore. ²⁵⁻²⁶Rü wüxi i Tupanaãrü puracütanüxũ rü nanaxwaxe i jaxna namaã naxĩnüãcüma meã najaxucuxẽe i ngẽma duũxũgü i tama irüxĩnüẽchaũxũ. Rü nanaxwaxe i ngẽmaãcü ínangungxẽe na Tupana nüxũ rüngüxẽẽxũ i ngẽma duũxũgü na nüxũ naxoexũcax i norü chixexũ rü nüxũ nacuaçgüxũcax i ngẽma ore i aixcuma ixĩxũ. Erü Tupana nanaxwaxe na naxuãẽgüxũ i ngẽma duũxũgü rü nawa ínanguxũxũ i ngẽma chixexũ i ngoxo i Chataná nagu najixẽẽxũ na noxrütama ngüchaũ namaã naxüxũcax.

Nuxãcü tá nixĩ i duũxũgü i ngẽxguma nagüxchaũgu i naãne

3 ¹Rü chanaxwaxe i nüxũ cucuaç rü ngẽxguma nagüxchaũgu i naãne rü tá nangẽxma i ãcümãxũgü rü guxchaxũgü naxcax i duũxũgü. ²Rü duũxũgü tá nügüguxicatama narüxĩnüẽ, rü norü dñeruguama tá narüxĩnüẽ, rü tá nügü ínãrutagü, rü ngẽmaãcü

tāuxūtáma nūxū nacuaxgüchaũ i togü i duũxügü i tama naxrũ taarü dīeruaxgüxũ. Rũ chixri Tupanachiga tá nidexagü, rũ tāuxūtáma nanatüga rũ naēga naxĩnũechaũ. Rũ tāuxūtáma moxē inaxā i ngēxguma Tupana nūxū rüngüxēēgu, rũ ngēmaācü tāuxūtáma nūxū nacuaxgüchaũ i Tupanaārü ore. ³Rũ tāuxūtáma nagu narüxĩnũē i togü i duũxügüxũ na nangechaũgüxũ, rũ tāuxūtáma nūxū nangechaũtümüügü. Rũ tá naxoregütaaxgü, rũ tāuxūtáma nügü naporaexēē na jaxna namaã naxĩnũexücax i naxũneārü ngüchaũgü. Rũ tá nichixecüma, rũ tá nachi naxaie i guxüma i tacü i mexü. ⁴Rũ duũxügüechitawaxegüxũ tá nixĩgü, rũ nuēwaxexü tá nixĩgü, rũ nügü icuaxüügüxũ tá nixĩgü. Rũ tá norü ngüchaũcaxama nadaugü, rũ tāuxūtáma Tupanaxü nacuaxgüchaũ. ⁵Rũ tá nügü najaxögüxüchinetaxēē notürü ngēma norü chixexü i naxügüxüwa tá nangoxoma na tama aixcuma jaxögüaxü i ngēma ore i mexü. Rũ ngēma duũxügü i ngēmaācü maxēxü, rũ tama name i namaã cuxāmücü rũ natanügu cuxā. ⁶⁻⁷Erü ngēma duũxügütanüwa nangēxmagü i nümaxü i duũxügü i ĩpatagu ichocuetanüxü. Rũ norü ngüxēētaemaã najawomüxēēgü i ngēma ngexügü i ngēma ngēxmagüxü i tama naāēxü icuaxü rũ ipecaduaxgüxũ. Rũ ngēma ngexügü, rũ norü ngüchaũgütama rũ chixexüwa nanagagü, rũ ngēmacax woo guxüguma nangüegü notürü taguma aixcuma nūxü nacuaxgü i ngēma ore i aixcuma ixixü. ⁸Rũ ngēma duũxügü i chixexümaã ngüxēētaegüxü, rũ chixexügüxicatama

narüxĩnũē, rũ tama aixcuma najaxögü i Tupanaārü ore. Rũ nachi naxaie i ngēma ore i aixcuma ixixü, naxrũ ga jema juũxügü ga Jane rũ Jābre ga tama Muísēga ĩnũechaũxü. ⁹Notürü ngēma togü i duũxügü rũ tāuxūtáma poraācü nūxü najaxögü i ngēma chixexümaã ngüxēētaegüxü. Erü guxüwama i duũxügü rũ tá nūxü nicuaxächitanü na ngēāēgümarexü jixĩgüxü jema taxre ga tama Muísēga ĩnũechaũxürüü.

**Pauro rü inajacuaxēē na
Timóteuna naxāgaxü**

¹⁰⁻¹¹Notürü cumax, Pa Timóteux, marü nūxü cucuax ga nhuxācü meã na chanangüexēēxü ga duũxügü, rũ nhuxācü meã chamaxüxü, rũ nhuxācü nagu charüxĩnũxü, rũ nhuxācü meã chajaxöxü, rũ nhuxācü nūxü changechaũxü rũ jaxna namaã chaxĩnũxü ga duũxügü, rũ nhuxācü nūxü chixuamaxü ga Tupanaārü ore woo duũxügü choxü imaxgüchaũgu rũ ngüxü chingexgu. Rũ nūxü cucuax ga tacü choxü na üpetüxü ga Átioquíawa rũ Icünüwa rũ Ristawa, rũ nhuxācü choxü na jamaxgüchaũxü ga duũxügü rũ ngüxü chingexü. Notürü tóri Cori ja Tupana choxü narüngüxēē na tama choxü jamaxgüxüchixücax. ¹²Rũ aixcuma cumaã nūxü chixu rũ guxāma ja jixema naxwaxegüe na Ngechuchu ja Cristucax tamaxēxü, rũ togü tá tümachi naxaie rũ chixri tá tümamaã nachopetü. ¹³Notürü ngēma duũxügü i chixecümagüxü rũ ngēma duũxügü i idorataaxgüxü rũ jexeraxü i chixexügu tá naji. Erü Chataná marü najawomüxēēgü, rũ ngēmacax nüxü

togũxĩ nawomũxẽẽgũ. ¹⁴Notĩrũ i cuma rũ name nixĩ i guxũguma meã nagu cuixũ i guxũma i ngẽma ore i marũ cungũxũ. Erũ cumatama rũ nũxũ cucuax na aixcuma jĩixũ i ngẽma ore, rũ nũxũ cucuax na texégũ tixĩgũxũ ga guxema namaã cuxũ nguxẽẽgũxe. ¹⁵Rũ cuma nũxũ cucuax rũ cubuxgumamatama nawa cungux i ngẽma Tupanaãrũ ore i iũnecxũ. Rũ ngẽmawa cunajaxu i cuax na nũxũ cucuáxũcax i nhuxãcü tũxũ na nangẽxmaxũ i maxũ i taguma gũxũ ega Ngechuchu ja Cristuaxũ jaxõgũgu. ¹⁶Rũ guxũma i Tupanaãrũ ore i iũmatũxũ rũ nũgũãẽwatama nanajaxu ga Tupana. Rũ ngẽma ore rũ name na duũxũgũxũ namaã ingũxẽẽxũ, rũ namaã jaxucuxẽgũxũ rũ namaã ijanawexãchixẽẽgũxũ, rũ namaã nangũxẽẽxũ na meã Tupanapexewa namaxẽxũcax. ¹⁷Rũ ngẽmaãcü i ngẽma ore rũ tũxũ narũngũxẽẽ ja jĩxema Tupanaãrũ ixĩxẽ, na meã nũxũ tacuáxũcax i ngẽma Tupana naxwaxexũ rũ itamemarexũ na tanaxũxũcax i nagũxũraũxũ i puracũ i Tupana tũmamaã nũxũ ixuxũ.

4 ¹⁻²Rũ nũma ja Ngechuchu ja Cristu ja nũma tá ũcü na nũxũ jacagũxũcax i ngẽma duũxũgũ i maxẽxũ rũ ngẽma marũ juechirẽxũ, rũ jimapexewa rũ Tupanapexewa cuxũ chamu na nũxũ cuixuxũcax i ngẽma ore i mexũ. Rũ ngẽxguma cuxũ jatauxchaãchigu rũ woo cuxũ naguxchagu, rũ chanaxwaxe i nũxũ cuixuama i ngẽma ore. Rũ ngẽmaãcü chanaxwaxe na icujanawexãchixẽẽgũxũ rũ meã cujaxucuxẽgũxũ rũ nũxũ cunangũchaũxẽẽxũ i duũxũgũ. Rũ name nixĩ i jaxna namaã cuxĩnũãcüma meã

cunangũxẽẽ. ³Erũ jixcũra i duũxũgũ rũ tãũxũtãma nũxũ naxĩnũẽchaũ i ngẽma nguxẽẽtae i mexũ. Erũ ngẽma duũxũgũ rũ nichixecũma. Rũ ngẽmacax naxcax nadaugũ i norũ ngũxẽẽruũgũ i nũma nanaxwaxegũxũãcüma nangũxẽẽxũ. ⁴Rũ tãũxũtãma nũxũ naxĩnũẽchaũ i Tupanaãrũ ore i aixcuma ixĩxũ. Erũ nũxũ najaxõgũ i ngẽma ore i doramare ixĩxũ rũ ngẽmaguama narũxĩnũẽ. ⁵Notĩrũ cuma rũ meã cugũna nadau, rũ ínaxuãẽ, rũ namaã napora ega ngũxũ cuxũ ũpetũgu! ;Rũ nũxũ ixuama i ore i mexũ i tũxũ maxẽxẽẽxũ, rũ meã janguxẽẽ i ngẽma puracũ i Tupana cuxna ãxũ! ⁶Tãũxũtãma muxũ i ngunexũ nhama i naãnewa changẽxma erũ marũ choxũ ningaica na Tupanaãrũ puracũ chaxũxũgagu chajuxũ rũ choxũ na jamaxgũxũ i duũxũgũ. ⁷Rũ chama rũ marũ guxũwama nũxũ chixuchigũ rũ íchajapoxũchigũ ga Tupanaãrũ ore i mexũ ga woo jemacax duũxũgũ chauchi na aixũ. Rũ guxũguma aixcuma Tupanacax chamaxãma rũ nũxũ chajaxõõma. Rũ nhuxma rũ marũ nawa nangu na chajuxũ. ⁸Rũ nhuxma rũ marũ Tupana choxũ namaã nanguxũ i ngẽma ãmare i mexẽchixũ ja tórũ Cori ja Ngechuchu ja ãẽxgacũ ja mecũ tá choxna ãxũ i ngẽxguma wenaxãrũ nhama i naãnewa naxũxgu. Rũ tãũxũtãma chaxica choxna nanaxã i ngẽma ãmare, notĩrũ tá tũxna nanaxã ja guxãma ja jĩxema tũmaãrũ ngũchaũmaã ínanguxẽẽgũxe na wenaxãrũ nũma naxũxũ.

Timúteuxũ naxucuxẽ ga Pauru

⁹Cumaã nũxũ chixu rũ chanaxwaxe i paxa nuã cuxũ, rũ choxũ ícujadau.

¹⁰Dema rũ nhama i naãneãrũ

ngêmaxũgu naxĩnũxũgagu choxna nixũ rü ããne ga Techarónicawa naxũ. Rü Cresête rü Gárataanewa naxũ, rü Titu i Darmáchiaanewa. ¹¹Rü Lucaxicatama nixĩ i nhũxma chauxũtawa ngêxmaxũ. Rü chanaxwaxe i naxçax cudau i Marcu na nuã cunagaxũçax. Erü nüma rü chauççax name na choxũ na nangũxêêxũ i nhaã puracüwa. ¹²Rü Tíquicu rü ããne i Epêchiuwa chanamu. ¹³Ngêxguma nuã cuxũxgu rü nuã nange i chorü dejuxũchiru ga ããne i Truádewa ngêxmaxũ ga Cárputatawa chatáxũ! Rü chanaxwaxe i nuã cunana i chorü poperagü. Rü guxũãrũ jexera chanaxwaxe i nuã cunana i ngêma chorü poperagü i idixgüpútaxũ. ¹⁴Alejãdru i cobrenaxçax i buetarearü üwa puracüxũ rü poraãcü chixri chamaã naxũpetü. Notürü Tupana nüxũ nacuax i nhuxãcü tá na napocuãxũ naxçax ga jema chixexũ ga chamaã naxũxũ. ¹⁵Meã cugüna nadau na tama chixexũ cumaã naxũxũçax! Erü poraãcüxũchima nachi naxai i Tupanaãrũ ore i mexũ. ¹⁶Jexguma noxrixũchima ãêxgacügüpexewa chaugüétüwa chidexagu rü taxúema choxũ tarüngũxêê. Guxũma choxna nibuxmü. Notürü tama chanaxwaxe i Tupana nagu narũxinü i ngêma. ¹⁷Notürü tórü Cori choxũ naporaxêê rü choxũ narüngũxêê na choxũ natauxchaxũçax

na nüxũ chixuxũçax ga norü ore i mexũ i tüxũ maxêxêêxũ. Rü jemaãcü guxũma ga jema duũxũgü ga tama jaxögüxũ ga jéma jexmagüxũ rü nüxũ naxĩnüê ga jema ore. Rü jemaãcü tórü Cori ja Ngechuchu choxũ ínanguxuchixêê ga jexguma taxũ ga ãücümaxũwa chajexmagu. ¹⁸Rü nüma ja tórü Cori tá choxũ ínanguxuchixêê nawa i guxũma i chixexũgü. Rü tá choxna nadau na ngextá ãêxgacü íjixũwa choxũ nagaxũçax. Rü tanaxwaxe i guxũguma nüxũ ticuaxũgü. Rü ngêmaãcü jixũ.

**Pauru rü wenaxãrũ Timóteuxũ
narüimoxê rü naxçax ínaca na
Cori ja Ngechuchu ja
Cristu nüxũ rüingũxêêxũ**

¹⁹Chanaxwaxe i chauégagu nüxũ curüimoxê i Prichira, rü Aquiru, rü Onechéperutanüxũgü. ²⁰Erastu rü ããne i Corítiugu narüxãüx. Rü Trófimü rü idaawexũma ããne i Miretuwa chanatax. ²¹Rü naxũpa i gáuanexũ rü chanaxwaxe i nuã cuxũ. Rü cuxũ narüimoxêgü i Eúburu, rü Prudêti, rü Rinu, rü Cráudia, rü guxũma i taeneêgü i jaxögüxũ. ²²Rü chanaxwaxe i tórü Cori ja Ngechuchu ja Cristu cumaã nangêxma, rü Tupana pexũ narüngũxêê ja guxãma i pemax.

*Rü nuãma pexna,
Pauru*